

Na osnovu člana 22 Statuta Brčko distrikta BiH („Službeni glasnik Brčko distrikta BiH“ broj 3/07), Skupština Brčko distrikta BiH na 51. redovnoj sjednici održanoj 26. juna 2007. godine usvaja

ZAKON O PROMETU EKSPLOZIVNIH MATERIJIA I ZAPALJIVIH TEČNOSTI I GASOVA

DIO PRVI GLAVA I. UVODNE ODREDBE

Član 1 (Predmet zakona)

Ovim zakonom regulišu se prijevoz, promet i korištenje eksplozivnih materija i zapaljivih tečnosti i gasova na teritoriji Brčko distrikta BiH.

Član 2 (Definicije)

- (1) Eksplozivne materije su čvrste i tečne hemijske materije koje imaju osobinu da pod pogodnim djelovanjem (udar ili trenje), eksplozivnim hemijskim razlaganjem oslobađaju energiju u obliku toplote ili gasova.
- (2) Eksplozivne materije iz stava 1 ovog člana su:
 - a) privredni eksplozivi,
 - b) sredstva za paljenje eksploziva,
 - c) pirotehnički proizvodi,
 - d) municija,
 - e) baruti,
 - f) sirovine eksplozivnog karaktera za proizvodnju materija iz tačaka a - e ovog stava.
- (3) Privredni eksplozivi su materije koje se upotrebljavaju za rušenje ili oblikovanje objekata i materija energijom oslobođenom hemijskim reakcijama eksplozivnog razlaganja.
- (4) Sredstva za paljenje eksploziva su sve vrste kapisli, upaljača i štapina i pirotehnička sredstva koja se upotrebljavaju pri miniranju.
- (5) Pirotehnički proizvodi su protugradne rakete i druge rakete koje se koriste u naučne, privredne i druge svrhe, pirotehnička sredstva za zabavu kao i predmeti koji sadrže eksplozivne sastojke, prskave sastojke s dejstvom eksploziva ili druge sastojke koji služe za postizanje efekata razaranja, vatre, svjetlosti, pucanja ili dima.
- (6) Municijom se smatraju meci, patrone i čahure opremljene kapislom i napunjene barutom.

- (7) Barutom se smatra crni i malodimni barut namijenjen za privredne ili sportske potrebe.
- (8) Sirovine eksplozivnog karaktera su materije koje po hemijskom sastavu i osjetljivosti na paljenje imaju osobine eksploziva i sposobne su za eksplozivno razlaganje, a namijenjene su za proizvodnju eksplozivnih materija.
- (9) Zapaljive tečnosti su tečnosti ili smješe tečnosti koje na temperaturi od 50 stepeni C imaju pritisak pare niži od 300 kPa (3 bar), a tačku paljenja nižu od 100 stepeni C. Zapaljive tečnosti dijele se prema tački svoje zapaljivosti (plamište) na grupe propisane standardom.
- (10) Zapaljivi gasovi su zbijeni gasovi, gasovi pretvoreni u tečnost i gasovi rastvoreni pod pritiskom koji imaju kritičnu temperaturu nižu od 50 stepeni C ili na 50 stepeni C pritisak pare viši od 300 kPa (3 bar).
- (11) Uskladištavanje zapaljivih tečnosti i gasova je svako trajno i privremeno držanje i smještaj ovih tečnosti i gasova u objektima, na slobodnom prostoru i u posudama bez obzira na njihovu veličinu i vrstu.
- (12) Promet eksplozivnih materija i zapaljivih tečnosti i gasova je nabavljanje, prodaja i upotreba eksplozivnih materija i zapaljivih tečnosti i gasova, kao i smještaj eksplozivnih materija i zapaljivih tečnosti i gasova u magacinima, priručnim skladištima i prodavnicama preduzeća, drugih pravnih lica, državnih organa i preduzetnika.

Član 3 **(Pirotehnička sredstva za zabavu)**

- (1) Pirotehnička sredstva za zabavu iz stava 5 člana 2 ovog zakona su:
 - a) Klasa I - pirotehničke igračke: bengalske šibice, pucajuće šibice, pucajući ulošci za cigarete, amorces za pištolje, konfeti - bombice, pucajuće žabice, pucajući bomboni, pasje bombice, pucajući čepovi, šibice sa zlatnom ili srebrnom kišom, naboji koji eksplodiraju pod nogama, pucajuće vrpce, male petarde te drugi slični proizvodi,
 - b) Klasa II - sredstva za male vatromete: petarde, rimske svjećice, mali vatrometni bicikl, fontane, bengalske vatre, bengalske svjećice, topovski pucnji tzv. Patry Knaller i rakete te drugi slični proizvodi,
 - c) Klasa III - sredstva za srednje vatromete: srednje veliki vatrometni proizvodi za javne priredbe,
 - d) Klasa IV - sredstva za velike vatromete: veliki vatrometni proizvodi za javne priredbe.

GLAVA II. ZAJEDNIČKE ODREDBE

Član 4

(Obaveze preduzeća i drugih pravnih lica, državnih i drugih organa, preduzetnika i pojedinaca)

Preduzeća i druga pravna lica, državni i drugi organi, preduzetnici i pojedinci, u toku prijevoza, prometa i korištenja eksplozivnih materija i zapaljivih tečnosti i gasova, dužni su radi zaštite života, zdravlja i sigurnosti ljudi, materijalnih dobara, čovjekove sredine i sigurnosti saobraćaja preduzimati sigurnosne mjere utvrđene zakonom, drugim propisima i općim aktima.

Član 5

(Spoljnotrgovinski promet eksplozivnih materija)

Način i uslovi pod kojima se može vršiti uvoz, izvoz, tranzit i posredovanje u spoljnotrgovinskom prometu eksplozivnih materija ili prometa usluga vezanih za spoljnotrgovinski promet eksplozivnih materija propisani su zakonima i drugim propisima Bosne i Hercegovine.

Član 6

(Pakovanje i označavanje eksplozivnih materija i zapaljivih tečnosti i gasova)

- (1) Eksplozivne materije i zapaljive tečnosti i gasovi mogu se stavljati u promet samo u pakovanju i s oznakama koje su predviđene propisima kojima se uređuje prijevoz opasnih materija.
- (2) Sudovi, odnosno druga ambalaža u kojoj se nalaze eksplozivne materije i zapaljive tečnosti i gasovi, su takvog kvaliteta da pri rukovanju i uskladištenju ne može doći do rasipanja tih materija ni do dodira tih materija s podom skladišta ili drugih prostorija u kojima su te materije smještene.

Član 7

(Rukovanje eksplozivnim materijama i zapaljivim tečnostima i gasovima)

- (1) Eksplozivnim materijama i zapaljivim tečnostima i gasovima u prometu mogu da rukuju samo punoljetna lica koja su stručno osposobljena za rukovanje tim materijama.
- (2) Stručna sprema i način provjere znanja lica koja rukuju eksplozivnim materijama i zapaljivim tečnostima i gasovima u vršenju poslova utovara i istovara, uskladištenja, čuvanja, nabavke i prodaje, obuhvata osnovna znanja o fizičko-hemijskim osobinama eksplozivnih materija, odnosno zapaljivih tečnosti i gasova kojima se vrši promet, kao i poznavanje propisa o prometu tih materija i odgovarajućih tehničkih normativa.

Član 8

(Objekti u kojima se drže eksplozivne materije, odnosno proizvode i drže zapaljive tečnosti i gasovi)

Objekti u kojima se drže eksplozivne materije, kao i objekti u kojima se proizvode ili drže zapaljive tečnosti i gasovi, mogu se graditi samo na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata koje bi mogle ugrožavati ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.

Član 9

(Kontrola provođenja mjera sigurnosti)

- (1) Preduzeća koja se bave proizvodnjom zapaljivih tečnosti i gasova, kao i preduzeća, druga pravna lica, državni i drugi organi ili preduzetnici koji u vršenju svoje djelatnosti nabavljaju, drže ili koriste eksplozivne materije i zapaljive tečnosti i gasove, dužni su da trajno kontrolišu sprovođenje propisanih uslova i mjera za njihovu proizvodnju, uskladištenje, korištenje i rukovanje.
- (2) Preduzeća, druga pravna lica, državni i drugi organi i preduzetnici iz stava 1 ovog člana dužni su da svojim aktom bliže utvrde mjere i ponašanja radnika u cilju potpunog obezbjeđenja od eksplozije, požara i mogućnosti zloupotrebe.

Član 10

(Utovar i istovar eksplozivnih materija i zapaljivih tečnosti i gasova)

Utovar i istovar eksplozivnih materija i zapaljivih tečnosti i gasova (utovar, utakanje, pretovar, pretakanje, istovar, istakanje i druge radnje u vezi s utovarom i istovarom) vrši se, po pravilu, danju i uz zabranu pristupa nepozvanim licima, a izuzetno i noću pod uslovima da osvjetljenje bude u skladu s propisanim tehničkim normativima kojima se uređuje rukovanje ovim materijama.

Član 11

(Zaštita objekata u kojima se proizvode ili drže eksplozivne materije ili zapaljive tečnosti i gasovi)

Odobrenje za izgradnju investicionog objekta ili objekta građana ne može se izdati ako se izgradnja predviđa u zonama koje ugrožavaju objekti u kojima se proizvode ili drže eksplozivne materije ili zapaljive tečnosti i gasovi.

DIO DRUGI

GLAVA I. EKSPLOZIVNE MATERIJE

Odjeljak A. Proizvodnja eksplozivnih materija

Član 12

(Uslovi za proizvodnju eksplozivnih materija)

- (1) Proizvodnjom eksplozivnih materija mogu se baviti pravna lica koja za to prethodno dobiju dozvolu od Ministarstva vanjske trgovine i ekonomskih odnosa BiH, u skladu s članom 3 Zakona o proizvodnji naoružanja i vojne opreme («Službeni glasnik BiH», broj: 9/04).
- (2) Preduzetnicima i pojedincima zabranjeno je proizvoditi eksplozivne materije, a pojedincima je zabranjeno i na bilo koji način eksplozivne materije staviti u promet.

Član 13

(Izgradnja objekata u kojima se drže eksplozivne materije)

- (1) Objekti u kojima se drže eksplozivne materije mogu se graditi samo na takvim mjestima i na takav način da se time ne stvara opasnost od požara i eksplozije za ove i druge objekte.
- (2) Objekti iz stava 1 ovog člana izgrađuju se u skladu s posebnim uslovima koje utvrđuje Policija Brčko distrikta BiH (u daljnjem tekstu: Policija).

Član 14

(Pakovanje eksplozivnih materija)

- (1) Pakovanja eksplozivnih materija moraju odgovarati standardima i propisanim tehničkim normativima.
- (2) Paketi, kao i svako pojedinačno pakovanje, moraju imati posebne oznake radi njihove identifikacije i to: naziv proizvođača, oznaku serije, serijski broj i godinu proizvodnje.
- (3) Uz svako pakovanje mora biti priloženo uputstvo o uslovima i načinu smještaja, čuvanja, upotrebi i načinu uništavanja odnosno vrste eksplozivne materije.

Odjeljak B. Promet eksplozivnih materija

Član 15

(Stavljanje u promet eksplozivnih materija)

- (1) Eksplozivne materije mogu se stavljati u promet samo na osnovu odobrenja koje izdaje nadležni organ unutrašnjih poslova u Bosni i Hercegovini.
- (2) Za svaku eksplozivnu materiju proizvedenu u inostranstvu uvoznik je dužan da uz zahtjev za izdavanje odobrenja iz stava 1 ovog člana priloži i stručno mišljenje stranog proizvođača kojim se dokazuju njene osobine.

Član 16

(Ispitivanje eksplozivnih materija)

- (1) Prije izdavanja odobrenja za stavljanje u promet eksplozivne materije koja je proizvedena u Brčko distriktu BiH, ta materija se ispituje.

- (2) Eksplozivne materije ispituje nadležno ovlašteno tijelo za ocjenu usaglašenosti u Bosni i Hercegovini kojeg, odlukom o osposobljenosti, odredi nadležno ministarstvo Bosne i Hercegovine.
- (3) Troškove ispitivanja eksplozivnih materija snosi preduzeće, drugo pravno lice ili preduzetnik koji traži odobrenje za stavljanje u promet eksplozivne materije.
- (4) Visinu naknade za ispitivanja eksplozivnih materija određuje nadležno ovlašteno tijelo za ocjenu usaglašenosti u Bosni i Hercegovini, koje je i vršilo to ispitivanje.

Član 17

(Zahtjev za izdavanje odobrenja za stavljanje u promet eksplozivnih materija)

Zahtjev za izdavanje odobrenja za stavljanje u promet eksplozivnih materija, pored osnovnih podataka o eksplozivnoj materiji, sadrži:

- a) naziv, osobine i druge podatke kojima se deklariše eksplozivna materija,
- b) opis radova za koje je eksplozivna materija namijenjena (podzemni i nadzemni radovi, radovi u metanskim jamama i sl.),
- c) stručno mišljenje preduzeća ili drugog pravnog lica ili komisije koja je ispitivala eksplozivne materije kojim se dokazuju njene osobine,
- d) uputstvo o načinu upotrebe i uništenja neutrošene količine eksplozivne materije,
- e) ostale podatke koji su značajni za sigurno korištenje eksplozivne materije.

Član 18

(Lista eksplozivnih materija koje se mogu staviti u promet)

- (1) Na osnovu izdatih odobrenja iz stava 1 člana 15 ovog zakona, Policija sastavlja listu eksplozivnih materija koje se mogu staviti u promet.
- (2) Lista iz stava 1 ovog člana objavljuje se u «Službenom glasniku Brčko distrikta BiH».

Odjeljak C. Nabavljanje i držanje eksplozivnih materija

Član 19

(Uslovi za nabavljanje i držanje eksplozivnih materija)

- (1) Eksplozivne materije mogu se nabavljati i držati samo na osnovu odobrenja za njihovu nabavku.
- (2) Odobrenje iz stava 1 ovog člana izdaje Policija.
- (3) Odobrenje za nabavku eksplozivnih materija izdaje se podnosiocu zahtjeva u dva primjerka.

- (4) Zahtjev za izdavanje odobrenja za nabavku eksplozivnih materija sadrži: naziv i sjedište preduzeća, drugog pravnog lica ili preduzetnika, odnosno podatke o licu koje podnosi zahtjev, podatke o licu koje će preuzeti eksplozivnu materiju, podatke o licu koje će rukovati eksplozivnim materijama, tehnički naziv eksplozivne materije, razloge zbog kojih se eksplozivne materije nabavljaju, količinu koja se nabavlja, podatke o mogućnosti smještaja eksplozivnih materija, načinu njihovog prijevoza, vremenu i mjestu izvođenja radova s tim materijama i rok do koga će one biti utrošene.
- (5) U slučaju da se eksplozivna materija ne upotrebljava na području Distrikta, Policija o izdavanju odobrenja za nabavku eksplozivnih materija o tome obavještava policijski organ na čijem području će se ta eksplozivna materija upotrijebiti.

Član 20 (Odobrenje za nabavku eksplozivnih materija)

- (1) Odobrenje za nabavku eksplozivnih materija neće se izdati:
 - a) maloljetnom licu;
 - b) licu koje je osuđeno za krivično djelo ili je kažnjeno za prekršaj ako krivično djelo, odnosno prekršaj ukazuje na njegovu nepodobnost za držanje eksplozivnih materija ili na mogućnost zloupotrebe tih materija, niti licu protiv koga se vodi krivični ili prekršajni postupak za takvo krivično djelo ili prekršaj;
 - c) licu koje nema opravdanu potrebu za eksplozivnom materijom;
 - d) licu koje nije osiguralo uslove potrebne za prijevoz, odnosno prenošenje i smještaj eksplozivnih materija ili nije stručno da rukuje eksplozivnom materijom, odnosno nije osiguralo stručno lice za rukovanje eksplozivnom materijom;
 - e) preduzeću, drugom pravnom licu ili preduzetniku koji ne ispunjava uslove smještaja i čuvanja eksplozivnih materija ili nema stručno lice za rukovanje eksplozivnim materijama.
- (2) Odobrenje za nabavku eksplozivnih materija neće se izdati ni ako to nalažu interesi javnog reda i mira, odnosno interesa sigurnosti kao ni ako eksplozivna materija nije na listi eksplozivnih materija koje se mogu stavljati u promet.
- (3) U rješenju kojim se na osnovu stava 1 tačke c i na osnovu stava 2 ovog člana odbija zahtjev za izdavanje odobrenja za nabavku eksplozivnih materija ne moraju se navesti razlozi kojima se Policija rukovala pri donošenju rješenja.

Član 21 (Važenje odobrenja za nabavku eksplozivnih materija)

- (1) Odobrenje za nabavku eksplozivnih materija izdaje se s određenim rokom važenja, uzimajući u obzir stvarne potrebe i to:

- a) preduzećima, drugim pravnim licima ili preduzetnicima za nabavku radi izvođenja određenih radova do 90 dana,
 - b) pojedincima do 30 dana.
- (2) Ako nabavka eksplozivnih materija u određenom roku iz opravdanih razloga ne bude ostvarena, Policija, na zahtjev preduzeća, drugog pravnog lica ili preduzetnika, odnosno pojedinca na kojeg odobrenje glasi, produžava rok važenja odobrenja.
- (3) Vrijeme važenja odobrenja može se produžiti samo jedanput i to najviše za vrijeme određeno u stavu 1 ovog člana.

Član 22

(Sadržaj rješenja kojim se odobrava nabavka eksplozivnih materija)

- (1) Rješenje kojim se odobrava nabavka eksplozivnih materija sadrži, pored ostalog, vrstu i količinu eksplozivnih materija za koje se odobrenje izdaje, kao i rok važenja odobrenja.
- (2) U rješenju kojim se odobrava nabavka eksplozivnih materija radi izvođenja određenih radova, pored podataka iz stava 1 ovog člana, naznačava se svrha u koju se eksplozivne materije mogu upotrijebiti, kao i rok do kojeg se one moraju upotrijebiti, odnosno uništiti ili vratiti preduzeću ili preduzetniku od kojeg su nabavljene.
- (3) Policija može rješenjem kojim se odobrava nabavka eksplozivnih materija odrediti sigurnosne i druge mjere koje je preduzeće, drugo pravno lice ili preduzetnik, odnosno pojedinac dužan preduzeti prilikom prijevoza, prijenosa, smještaja i upotrebe tih materija.
- (4) Preduzeće, drugo pravno lice ili preduzetnik, odnosno pojedinac dužni su se pridržavati naloženih mjera iz stavova 2 i 3 ovog člana.
- (5) Ako eksplozivne materije iz opravdanih razloga ne budu upotrijebljene u roku određenom u stavu 2 ovog člana, Policija na zahtjev preduzeća, drugog pravnog lica ili preduzetnika, odnosno pojedinca može taj rok produžiti.

Član 23

(Količina eksplozivnih sredstava čija se nabavka može odobriti)

- (1) Jednim rješenjem kojim se odobrava nabavka eksplozivnih materija pojedincu se može odobriti nabavka najviše pet kilograma eksplozivne materije, 50 komada sredstava za paljenje i odgovarajuće količine sporogorećeg štapina.
- (2) Izuzetno od odredbe iz stava 1 ovog člana, pojedincu se može odobriti nabavka veće količine eksplozivnih materija, veći broj sredstava za paljenje i veća količina sporogorećeg štapina, ako se na osnovu priložene dokumentacije može utvrditi da su za izvođenje radova potrebne te količine.

- (3) U odobrenju za nabavku eksplozivnih materija koje se izdaje pojedincu određuje se i mjesto nabavke te materije koje je najbliže mjestu upotrebe eksplozivne materije.
- (4) Pojedinaac koji je nabavio eksplozivne materije dužan je da po završenim radovima preostale količine tih materija vrati preduzeću, drugom pravnom licu ili preduzetniku od kojih ih je nabavio ili da ih stručno uništi i o tome obavijesti Policiju.

Član 24 (Pozajmljivanje eksplozivnih materija)

- (1) Preduzeće koje je dobilo odobrenje za nabavku eksplozivnih materija može, u slučaju potrebe pozajmiti od drugog preduzeća samo one eksplozivne materije i u onim količinama koje su navedene u odobrenju za nabavku eksplozivnih materija.
- (2) Preduzeće koje je drugom preduzeću pozajmilo eksplozivne materije dužno je da u roku od osam dana od dana kada je predata eksplozivna materija tom preduzeću obavijesti Policiju o vrsti i količini pozajmljenih eksplozivnih materija.

Član 25 (Evidencija o izdatim odobrenjima za nabavku eksplozivnih materija)

- (1) Policija je dužna da vodi evidenciju o izdatim odobrenjima za nabavku eksplozivnih materija.
- (2) Evidencija iz stava 1 ovog člana sadrži:
 - a) broj i datum rješenja kojim je odobrena nabavka eksplozivnih materija,
 - b) naziv, sjedište i adresu preduzeća, drugog pravnog lica ili preduzetnika, odnosno prezime i ime, prebivalište i adresu lica kome je odobrenje izdato,
 - c) odobrenu vrstu i količinu eksplozivnih materija,
 - d) svrhu nabavljanja eksplozivnih materija,
 - e) rok do koga se eksplozivne materije moraju upotrijebiti, odnosno vratiti ili uništiti.

Odjeljak D. Nabavka i prodaja eksplozivnih materija

Član 26 (Odobrenje za nabavljanje i prodaju eksplozivnih materija)

- (1) Nabavkom i prodajom eksplozivnih materija (u daljnjem tekstu: promet) mogu se baviti preduzeća, druga pravna lica i preduzetnici koji su registrovani za vršenje te djelatnosti i koji za to dobiju odobrenje Policije.

- (2) Prije izdavanja odobrenja iz stava 1 ovog člana, Policija utvrđuje da li podnosilac zahtjeva ispunjava uslove u pogledu poslovnih prostorija, uređaja i opreme prodavnice, mjera sigurnosti, mogućnosti smještaja eksplozivnih materija, kao i u pogledu stručnosti kadra.
- (3) Policija može zatražiti od podnosioca zahtjeva da u pogledu poslovnih prostorija, uređaja i opreme prodavnice i mogućnosti smještaja eksplozivnih materija pribavi stručnu ocjenu o primjeni mjera i normativa zaštite od požara i eksplozija od stručnog i ovlaštenog preduzeća ili drugog pravnog lica registrovanog u Bosni i Hercegovini.
- (4) Preduzetnik koji se bavi trgovinskim prometom iz stava 1 ovog člana, kao i lica koja obavljaju poslove i zadatke prodaje eksplozivnih materija, obavezni su ispunjavati uslove iz Zakona o oružju i municiji Brčko distrikta BiH, propisane za lica koja prodaju oružja, o čemu Policija donosi rješenje.

Član 27

(Uputstvo o načinu upotrebe eksplozivne materije i uputstvo o načinu njenog uništenja)

- (1) Preduzeća, druga pravna lica i preduzetnici koji se bave prometom eksplozivnih materija dužni su da od proizvođača pribave stručno mišljenje o njenim osobinama kojim se potvrđuje da eksplozivna materija ispunjava utvrđene uslove u odobrenju za njeno stavljanje u promet. Uz stručno mišljenje o osobinama eksplozivne materije, prilaže se uputstvo o načinu upotrebe eksplozivne materije i uputstvo o načinu njenog uništenja.
- (2) Uz eksplozivne materije koje se stavljaju u promet obavezno se prilaže uputstvo iz stava 1 ovog člana, koja sadrži:
 - a) ime i hemijski naziv eksplozivne materije,
 - b) podatke o sadržaju aktivnih supstanci,
 - c) datum proizvodnje eksplozivne materije,
 - d) rok upotrebe,
 - e) naziv i adresu proizvođača,
 - f) podatke o načinu i uslovima skladištenja,
 - g) opis radova za koje je namijenjena.
- (3) Preduzeća, druga pravna lica i preduzetnici koji se bave prometom eksplozivnih materija dužni su da prilikom prodaje eksplozivnih materija uz svako pakovanje prilože uputstvo iz stava 1 ovog člana.

Član 28 **(Izdavanje eksplozivnih materija)**

- (1) Odgovorno lice u prodavnici može izdati eksplozivne materije samo licu na koje odobrenje glasi, kao i licu koje je u odobrenju za nabavku za to izričito ovlašteno.
- (2) Prije izdavanja eksplozivnih materija, odgovorno lice u prodavnici dužno je da utvrdi identitet lica koje traži da mu se te materije izdaju.
- (3) Odgovorno lice u prodavnici neće izdati eksplozivne materije licu za koje se može osnovano zaključiti da je pod uticajem alkohola ili opojnih droga ili da su nastupile druge okolnosti koje ga čine nepodobnim za preuzimanje eksploziva.
- (4) Preduzeće ili drugo pravno lice ili preduzetnik iz člana 26 ovog zakona kod koga su nabavljene eksplozivne materije, dužno je da na oba primjerka rješenja, pored vrste i količine pojedinih eksplozivnih materija, naznači i datum izdavanja tih materija, kao i oznake pakovanja iz člana 14 ovog zakona.

Član 29 **(Evidencije o nabavci i prodaji eksplozivnih materija)**

- (1) Preduzeća, druga pravna lica i preduzetnici koji se bave trgovinskim prometom eksplozivnih materija dužni su voditi propisane evidencije o nabavci i prodaji eksplozivnih materija.
- (2) Evidencije iz stava 1 ovog člana sadrže:
 - a) naziv i adresu preduzeća, drugog pravnog lica i preduzetnika koji nabavlja i prodaje eksplozivne materije, odnosno ime i prezime, adresu i broj lične karte lica koje nabavlja eksplozivne materije,
 - b) naziv i količinu eksplozivne materije,
 - c) ime i prezime, adresu i broj lične karte lica koje je preuzelo eksplozivne materije,
 - d) broj odobrenja za nabavku eksplozivnih materija i naziv policijskog organa koji je izdao odobrenje, datum izdavanja eksplozivne materije, potpis lica koje je izdalo i potpis lica koje je preuzelo eksplozivnu materiju.

Član 30 **(Smještaj eksplozivnih materija koje su u prometu)**

- (1) Preduzeća, druga pravna lica ili preduzetnici koji se bave prometom eksplozivnih materija na malo mogu u svojim prodavnicama ili priručnim skladištima da smještaju samo municiju, lovački barut, kapisle za lovačku municiju, pirotehničke proizvode, sporogoreći štapin i pomoćna sredstva za paljenje, pod uslovom da ukupna količina baruta zajedno s barutom koji se nalazi u municiji, ne prelazi količinu od 20 kilograma.

- (2) Količine eksplozivnih materija veće od količine iz stava 1 ovog člana i ostale vrste eksplozivnih materija moraju biti smještene u magacinima.

Član 31 (Prodavnice eksplozivnih materija)

- (1) Prodavnice eksplozivnih materija su od vatrostalnog materijala, osiguravaju se od provale i snabdijevaju masivnom metalnom kasom u kojoj se čuvaju eksplozivne materije van radnog vremena.
- (2) U prodavnicama u kojima se pored eksplozivnih materija prodaju i druge robe, odjeljak za eksplozivne materije je odvojen od ostalog prostora pregradom ili zidom i vidno obilježen.
- (3) Smještaj i čuvanje eksplozivnih materija u prodavnicama se obavlja u skladu s tehničkim normativima i uputstvima proizvođača.

Odjeljak E. Prijevoz eksplozivnih materija

Član 32 (Uslovi koje mora ispunjavati lice koje nosi, odnosno prevozi eksplozivne materije)

- (1) Lice koje sa sobom nosi eksplozivne materije, dužno je kod sebe imati odobrenje na osnovu kojeg su te materije nabavljene i na zahtjev ovlaštenog službenog lica Policije (u daljnjem tekstu: ovlašteno službeno lice) to odobrenje daje na uvid.
- (2) Lice koje prevozi eksplozivne materije, pored isprave o prijevozu opasne materije, certifikata o ispravnosti vozila, uvjerenja o stručnoj osposobljenosti za upravljanje vozilom i uputstva o posebnim mjerama sigurnosti, dužno je da kod sebe ima odobrenje za prijevoz i odobrenje za nabavku eksplozivnih materija i na zahtjev ovlaštenog službenog lica ta odobrenja daje na uvid.
- (3) Ovlašteno službeno lice, ukoliko utvrdi da prijevoznik nema sa sobom propisane isprave ili odobrenja, naređuje prijevozniku da vozilo kojim se prevoze eksplozivne materije parkira na za to određenom mjestu, za vrijeme dok se ne osiguraju uslovi za daljnji prijevoz.
- (4) Ukoliko se utvrdi da prijevozniku nisu izdate potrebne isprave ili odobrenja, ovlašteno službeno lice privremeno oduzima eksplozivne materije i osigurava njihov prijevoz do najbližeg skladišta.
- (5) Troškove koji nastaju u slučajevima iz stava 4 snosi prijevoznik.
- (6) Ovlašteno službeno lice privremeno oduzima eksplozivne materije koje se nose ako njihov imalac nema odobrenje za nabavku.

Član 33
(Odobrenje za prijevoz eksplozivnih materija)

- (1) Odobrenje za prijevoz eksplozivnih materija, kada se pošiljka upućuje iz Brčko distrikta BiH, izdaje Policija.
- (2) Policija može po potrebi, da naredi preduzimanje i posebnih mjera sigurnosti pri prijevozu određene eksplozivne materije (pravac kretanja, pratnja pošiljaoca ili prijevoznika, pratnja pripadnika Policije i dr.).

Član 34
(Zahtjev za izdavanje odobrenja za prijevoz eksplozivnih materija)

- (1) Zahtjev za izdavanje odobrenja za prijevoz eksplozivnih materija podnosi pošiljalac, uvoznik, kupac ili isporučilac eksplozivne materije i on sadrži:
 - a) naziv, odnosno lično ime i adresu pošiljaoca,
 - b) vrstu, tehnički naziv, količinu i način pakovanja eksplozivne materije,
 - c) ivični broj pod kojim se eksplozivna materija vodi u nomenklaturi opasnih materija odgovarajućeg međunarodnog sporazuma za prijevoz opasnih materija,
 - d) naziv i adresu proizvođača,
 - e) naziv i adresa prijevoznika, odnosno lično ime vozača, suvozača ili pratioca,
 - f) datum i približno sat započinjanja prijevoza, trasu kretanja i krajnje mjesto prijevoza,
 - g) naznačenje vrste, tipa i registarske oznake prijevoznog sredstva,
 - h) naziv, odnosno lično ime i adresu primaoca,
 - i) vanredne mjere sigurnosti za vrijeme prijevoza eksplozivne materije,
 - j) naziv ulaznog ili izlaznog graničnog prijelaza i vrijeme kada će se izvršiti prijevoz eksplozivne materije preko graničnog prijelaza, odnosno teritorije Brčko distrikta BiH.
- (2) Preduzeća koja se bave trgovinskim prometom eksplozivnih materija, a u okviru svoje djelatnosti vrše i izvođenje minerskih radova, u zahtjevu za izdavanje odobrenja za prijevoz eksplozivnih materija, pored podataka iz stava 1 ovog člana, dužni su priložiti i ugovor ili drugi dokument, kao dokaz o izvođenju radova miniranja.

Član 35
(Način prijevoza eksplozivnih materija)

- (1) Prijevoz eksplozivnih materija vrši se u skladu s posebnim zakonom.

- (2) Eksplozivne materije ne smiju se predavati niti primati na prijevoz kao prtljag.

Odjeljak F. Upotreba eksplozivnih materija

Član 36

(Mjere sigurnosti u postupanju s eksplozivnim materijama)

- (1) Preduzeće, drugo pravno lice, preduzetnik i pojedinac koji nabave eksplozivne materije iz člana 20 ovog zakona, dužni su da brižljivo čuvaju da ove materije ne dođu u ruke neovlaštenom ili maloljetnom licu i da se pridržavaju uputa proizvođača o načinu njihove upotrebe, čuvanja i uslova smještaja.
- (2) U slučaju nestanka eksplozivnih materija preduzeće, drugo pravno lice, preduzetnik i pojedinac dužni su preduzeti potrebne mjere za njihovo pronalaženje i o nestaloj količini eksplozivnih materija odmah obavijestiti Policiju.

Član 37

(Uslovi za upotrebu eksplozivnih materija)

- (1) Preduzeća, druga pravna lica i preduzetnici mogu se baviti upotrebom eksplozivnih materija u vršenju svoje djelatnosti ako su registrovani za vršenje djelatnosti koja zahtijeva upotrebu eksplozivnih materija i ispunjavaju propisane uslove za smještaj eksplozivnih materija i osiguraju lice koje je stručno osposobljeno za poslove neposredne upotrebe eksplozivnih materija.
- (2) Preduzeće, drugo pravno lice, preduzetnik i pojedinac mogu povjeriti poslove neposredne upotrebe eksplozivnih materija u građevinarstvu samo licu koje je stručno osposobljeno i koje ispunjava druge propisane uslove.
- (3) Poslove iz stava 2 ovog člana ne smije vršiti lice koje ne ispunjava za to propisane uslove.

Član 38

(Mineri)

- (1) Preduzeće, drugo pravno lice, preduzetnik i pojedinac dužni su voditi nadzor nad licem koje pali eksplozive (u daljnjem tekstu: miner) u pogledu količine utrošenih eksplozivnih materija.
- (2) Preduzeće, drugo pravno lice, preduzetnik i pojedinac kojima je odobrenje za nabavku eksplozivnih materija izdato radi vršenja određenih radova, izdaju eksplozivne materije mineru uz potvrdu koja sadrži: datum izdavanja, vrstu, količinu izdatih eksplozivnih materija, vrijeme predviđeno za paljenje (datum i sat), kao i potpis minera.
- (3) Miner je dužan da istog dana, po izvršenom paljenju, preduzeću, drugom pravnom licu, preduzetniku, odnosno pojedincu od koga je primio eksplozivne materije, izda potvrdu s podacima o vremenu kad su eksplozivne materije upotrijebljene (datum i sat), vrsti i količini utrošenih eksplozivnih materija i u koju svrhu su eksplozivne materije upotrijebljene.

- (4) Za tačnost podataka u potvrdama iz stavova 2 i 3 ovog člana odgovorni su vlasnik eksplozivnih materija i miner.

Član 39

(Postupak s neupotrijebljenim eksplozivnim materijama)

- (1) Preduzeće, drugo pravno lice i preduzetnik koji upotrebljavaju eksplozivne materije, dužni su vratiti neupotrijebljene eksplozivne materije i neupotrebljivu ambalažu u kojoj su bile upakovane eksplozivne materije preduzeću, drugom pravnom licu ili preduzetniku od kojih je nabavio ili da ih unište u skladu s uputstvom proizvođača i na način kojim se ne ugrožava život, zdravlje i sigurnost ljudi, materijalna dobra i čovjekova sredina.
- (2) Preduzeće, drugo pravno lice i preduzetnik iz stava 1 ovog člana dužni su da Policiju obavijeste o mjestu, vremenu i načinu uništavanja neupotrijebljenih eksplozivnih materija i neupotreblijive ambalaže, i to najkasnije dva dana prije dana određenog za uništenje tih materija, odnosno ambalaže.

Član 40

(Obaveza prijavljivanja dopreme eksplozivnih materija)

- (1) Preduzeće, drugo pravno lice, preduzetnik i pojedinac koji na području Brčko distrikta BiH upotrebljavaju eksplozivne materije za koje Policija nije izdala odobrenje za njihovu nabavku, dužni su da Policiji, prije upotrebe, a najkasnije u roku od 24 sata od njihove dopreme, prijave vrstu i količinu tih materija, dan, sat, način i svrhu dopreme, naziv policijskog organa koji je izdao odobrenje za njihovu nabavku, mjesto i način uskladištenja, odnosno držanja tih eksplozivnih materija, kao i vrijeme i mjesto njihove upotrebe.
- (2) Policija može zabraniti upotrebu eksplozivnih materija, ako za to nisu ispunjeni propisani uslovi.

Član 41

(Evidencije o nabavljenim, utrošenim, ustupljenim, uništenim ili nestalim eksplozivnim materijama)

- (1) Preduzeće, drugo pravno lice i preduzetnik koji upotrebljavaju eksplozivne materije u vršenju svoje djelatnosti dužni su da uredno vode evidenciju o nabavljenim, utrošenim, ustupljenim, uništenim ili nestalim eksplozivnim materijama.
- (2) Evidencija iz stava 1 ovog člana sadrži:
 - a) naziv policijskog organa koji je izdao odobrenje za nabavku, broj i datum odobrenja;
 - b) naziv, sjedište i adresa preduzeća, drugog pravnog lica ili samostalnog preduzetnika od kojeg su eksplozivne materije nabavljene;
 - c) vrstu i količinu nabavljene eksplozivne materije i datum nabavljanja;

- d) podatke o vrsti i količini utrošenih eksplozivnih materija i svrhu u koju su utrošene;
 - e) podatke o vrsti i količini otuđenih, uništenih ili nestalih eksplozivnih materija, kome i kada su predate, odnosno kada su uništene ili nestale.
- (3) Evidencija iz stava 2 ovog člana vodi se na propisanom obrascu u knjizi koju ovjerava Policija.

Odjeljak G. Ispaljivanje protugradnih raketa i priređivanje vatrometa

Član 42 (Mjesto ispaljivanja protivgradnih raketa)

Mjesto na kome se ispaljuju protivgradne rakete je udaljeno najmanje 100 metara od stambenih i privrednih objekata.

Član 43 (Priređivanje vatrometa)

- (1) Za priređivanje vatrometa i sličnih priredbi pribavlja se odobrenje od Policije najkasnije pet dana prije održavanja vatrometa.
- (2) U zahtjevu za izdavanje odobrenja, pored ostalog, navodi se: mjesto, vrijeme i svrha održavanja priredbe, količina pirotehničkih sredstava koja će se upotrijebiti, mjere osiguranja (elaborat) i lice koje će rukovati s pirotehničkim sredstvima.
- (3) Priređivač je dužan da sprovede mjere osiguranja koje mu rješenjem odredi Policija.
- (4) Policija može zabraniti održavanje priredbi iz stava 1 ovog člana ako to zahtijevaju razlozi javne sigurnosti, i u tom slučaju Policija je dužna donijeti rješenje o zabrani i dostaviti ga priređivaču najkasnije 48 sati prije održavanja priredbe.

Odjeljak H. Promet i upotreba pirotehničkih sredstava

Član 44 (Promet pirotehničkih sredstava)

- (1) Pirotehnička sredstva za zabavu klase I mogu se tokom cijele godine prodavati i licima mlađim od 18 godina i to samo u prodavnicama oružja i municije.
- (2) Pirotehnička sredstva za zabavu klase II mogu se u maloprodaji prodavati samo u prodavnicama oružja i municije licima starijim od 18 godina, a njih mogu koristiti samo punoljetna lica ili lica mlađa od 18 godina pod nadzorom roditelja, odnosno staratelja.

- (3) Nabavkom i prodajom pirotehničkih sredstava za zabavu klase III i IV mogu se baviti samo preduzeća, druga pravna lica, odnosno preduzetnici koja imaju odobrenje Policije.
- (4) Na svakom pojedinačnom pakovanju pirotehničkih sredstava za zabavu proizvođač, odnosno uvoznik je dužan da postavi natpis na jeziku jednog od konstitutivnih naroda u Bosni i Hercegovini s nazivom proizvoda i proizvođača, klase, upozorenjem i uputstvom za upotrebu.

Član 45

(Zabrana držanja i upotrebe pirotehničkih sredstava)

- (1) U izlozima nije dozvoljeno držanje pirotehničkih sredstava za zabavu.
- (2) Pirotehnička sredstva za zabavu klase II nije dozvoljeno upotrebljavati u zatvorenim prostorima i na mjestima masovnijeg okupljanja građana.
- (3) Period u kome je dozvoljena maloprodaja i upotreba pirotehničkih sredstava za zabavu klase II određuje šef Policije.

Član 46

(Evidencije o prometu pirotehničkih sredstava za zabavu)

- (1) Preduzeće, drugo pravno lice i preduzetnik koji se bave prometom pirotehničkih sredstava za zabavu dužni su da vode evidenciju o nabavljenim i prodanim pirotehničkim sredstvima za zabavu.
- (2) Evidencija iz stava 1 ovog člana sadrži:
 - a) broj i datum odobrenja za nabavku pirotehničkih sredstava za zabavu;
 - b) naziv, sjedište i adresu pravnog lica ili preduzetnika od kojeg su pirotehnička sredstva za zabavu nabavljena;
 - c) vrstu i količinu nabavljenih pirotehničkih sredstava za zabavu i datum nabavljanja;
 - d) podatke o količini prodanih pirotehničkih sredstava za zabavu.

Odjeljak I. Magacini za smještaj eksplozivnih materija

Član 47

(Lokacije magacina)

- (1) Magacini za smještaj eksplozivnih materija su van naseljenih mjesta i dovoljno udaljeni od javnih puteva, željezničkih pruga i dalekovoda visokog napona, odnosno odvojeni od tih objekata zaštitnim grudobranom ili zidom koji pruža punu zaštitu od eksplozije i požara.

- (2) Šef Policije u sporazumu s ministrom odbrane Bosne i Hercegovine donosi propise o utvrđivanju sigurnosnih rastojanja za sve tipove skladišta, utovarnih, pretovarnih i istovarnih mjesta, kao i propise kojima se bliže utvrđuju uslovi koje moraju da ispunjavaju ti objekti, mjesta i način njihovog fizičkog osiguranja.

Član 48
(Održavanje magacina)

- (1) Magacini u kojima se drže eksplozivne materije održavaju se u skladu s propisanim tehničkim normativima.
- (2) Držanje eksplozivnih materija u magacinu, u pogledu vrste i količine, vrši se u skladu s rješenjem kojim je odobrena upotreba odnosnog magacina.

Član 49
(Osiguranje magacina)

- (1) Magacini u kojima su smještene eksplozivne materije se osiguravaju od pristupa neovlaštenih lica.
- (2) Ključeve od magacina u kojima se drže eksplozivne materije može čuvati samo lice koje se stara o smještaju i izdavanju tih materija.

Član 50
(Držanje većih količina eksplozivnih materija)

Preduzeća, druga pravna lica, državni organi, preduzetnici i pojedinci količine eksplozivnih materija preko 20 kg drže u propisno izgrađenim magacinima, odnosno kontejnerima ili priručnim skladištima, u skladu s odredbama ovog zakona.

Član 51
(Urbanistička saglasnost za izgradnju skladišta eksplozivnih materija)

- (1) Urbanistička saglasnost za izgradnju skladišta eksplozivnih materija neće se izdati ako se ne pribavi saglasnost na lokaciju od Policije.
- (2) Prije izdavanja saglasnosti, Policija može od investitora zatražiti da na tehničku dokumentaciju iz stava 3 ovog člana pribavi stručnu ocjenu o primjeni mjera i normativa zaštite od požara i eksplozija od stručnog i ovlaštenog preduzeća ili drugog pravnog lica registrovanog u Bosni i Hercegovini.
- (3) Podnosilac zahtjeva za izdavanje odobrenja za lokaciju objekta uz zahtjev prilaže:
 - a) situacioni plan terena na kome namjerava graditi objekat za koji se traži odobrenje mjesta s ucrtanim položajem i gabaritima već postojećih objekata ovjeren od odjeljenja Vlade Brčko distrikta BiH nadležnog za poslove katastra;
 - b) tehnički opis terena prikazanog na situacionom planu;

- c) tehnički opis objekta koji se namjerava graditi;
- d) popis vrste i količine eksplozivnih materija koje će se uskladištiti.

Član 52

(Odobrenje za izgradnju magacina za smještaj eksplozivnih materija)

Odobrenje za izgradnju magacina za smještaj eksplozivnih materija izdaje nadležno odjeljenje Vlade Brčko distrikta BiH, uz prethodno pribavljene saglasnosti na investiciono-tehničku dokumentaciju od odjeljenja nadležnog za poslove javne sigurnosti.

Član 53

(Odobrenje za upotrebu magacina za smještaj eksplozivnih materija)

- (1) Upotrebu magacina za smještaj eksplozivnih materija odobrava organ koji je izdao odobrenje za izgradnju.
- (2) Odobrenje se može izdati nakon izvršenog tehničkog pregleda.
- (3) U odobrenju o predaji na upotrebu magacina iz stava 1 ovog člana određuje se koje vrste eksplozivnih materija i u kojim količinama se mogu smještati u magacinu.

Član 54

(Kontejneri i privremena skladišta eksplozivnih materija)

- (1) Preduzeća, druga pravna lica, državni organi i preduzetnici, čija djelatnost zahtijeva upotrebu eksplozivnih materija, mogu te materije, u količini do 500 kg, za potrebe izvođenja radova, odnosno vršenje druge odgovarajuće djelatnosti držati u kontejneru ili privremenom skladištu koji su za to izrađeni i koji ispunjavaju propisane uslove.
- (2) Kontejneri i privremena skladišta eksplozivnih materija u količinama do 500 kg mogu se postaviti samo na mjestu za koje je odobrenje izdala Policija uz poštivanje uslova iz člana 11 ovog zakona.
- (3) Prije izdavanja odobrenja Policija može od investitora zatražiti da na tehničku dokumentaciju iz člana 51 stava 3 ovog zakona pribavi stručnu ocjenu o primjeni mjera i normativa zaštite od požara i eksplozija od stručnog i ovlaštenog preduzeća ili drugog pravnog lica registrovanog u Bosni i Hercegovini.
- (4) Rješenje kojim se odobrava postavljanje privremenih skladišta određuje se rok do koga se u njemu na odobrenim mjestima mogu držati eksplozivne materije.
- (5) Ovaj rok ne može biti duži od dvije godine, a na zahtjev zainteresovanog preduzeća, drugog pravnog lica, državnog organa ili preduzetnika, može se produžiti na dvije godine bez ograničenja broja produženja, pod uslovom da se pregledom utvrdi da nisu izmijenjeni uslovi na mjestu lokacije privremenog skladišta.

Član 55
(Održavanje kontejnera i privremenih skladišta)

Preduzeća, druga pravna lica, državni organi kao i preduzetnici koji koriste kontejner ili privremeno skladište dužni su da objekat, uređaje i instalacije u njemu, kao i zaštitnu zonu, održavaju prema propisanim tehničkim normativima i da organizuju fizičku zaštitu tog objekta.

Član 56
(Odobrenje lokacije za utovar i istovar eksplozivnih materija)

Mjesto gdje se smiju utovarati i istovarati eksplozivne materije van kruga preduzeća, drugog pravnog lica i preduzetnika, koji te materije drže radi upotrebe u vršenju djelatnosti, odobrava Policija.

GLAVA II. ZAPALJIVE TEČNOSTI I GASOVI

Odjeljak A. Skladištenje i držanje zapaljivih tečnosti i gasova

Član 57
(Izgradnja magacina i skladišta za smještaj zapaljivih tečnosti i gasova)

Pri izgradnji magacina i skladišta za smještaj zapaljivih tečnosti i gasova, u tehničkoj dokumentaciji, kao i u dozvoli za upotrebu, prema tehničkim normativima i standardima, određuje se količina i vrsta gasova, odnosno količina zapaljivih tečnosti po grupama, koja se može smjestiti u magacin ili skladište.

Član 58
(Držanje zapaljivih tečnosti i gasova)

Zapaljive tečnosti i gasovi drže se u posudama i rezervoarima, odnosno objektima koji odgovaraju propisanim tehničkim normativima i standardima za određenu vrstu tečnosti, odnosno gasa.

Član 59
(Označavanje posude sa zapaljivom tečnošću)

Na posudi sa zapaljivom tečnošću u prometu vidljivo se označava grupa u koju spada zapaljiva tečnost s obzirom na njeno plamište.

Odjeljak B. Proizvodnja, prerada, uskladištavanje i trgovinski promet zapaljivih tečnosti i gasova

Član 60
(Uslovi za trgovinski promet zapaljivih tečnosti i gasova)

Nabavkom i prodajom zapaljivih tečnosti i gasova (u daljnjem tekstu: trgovinski promet) mogu se baviti preduzeća, druga pravna lica i preduzetnici koji su

registrovani za vršenje te djelatnosti i koji osiguraju objekat za obavljanje trgovinskog prometa uređen u skladu s propisanim tehničkim normativima i standardima.

Član 61 (Mjesto i način postavljanja objekata)

Objekti za proizvodnju, preradu, uskladištavanje i trgovinski promet zapaljivih tečnosti i gasova (skladišta, magacini i rezervoari, naftovodi i gasovodi, stanice za snabdijevanje gorivom motornih vozila, prodavnice i sl.) mogu se graditi, odnosno postavljati na mjestu i na način kojim se ne stvara opasnost od požara ili eksplozija za ove i druge objekte.

Član 62 (Odobrenje za lokaciju)

- (1) Odobrenje za lokaciju za izgradnju objekta iz člana 61 ovog zakona izdaje odjeljenje Vlade Brčko distrikta BiH nadležno za poslove javne sigurnosti.
- (2) Prije izdavanja odobrenja na lokaciju isto odjeljenje može od investitora zatražiti da na dokumentaciju iz stava 3 ovog člana pribavi stručnu ocjenu o primjeni mjera i normativa zaštite od požara i eksplozija od stručnog i ovlaštenog preduzeća ili drugog pravnog lica registrovanog u Bosni i Hercegovini.
- (3) Podnosilac zahtjeva za izdavanje odobrenja za lokaciju objekta iz stava 1 ovog člana uz zahtjev prilaže:
 - a) situacioni plan terena na kome namjerava graditi, odnosno postaviti objekat za koji traži odobrenje mjesta s ucrtanim gabaritima postojećih objekata, ovjeren od odjeljenja Vlade Brčko distrikta BiH nadležnog za poslove katastra;
 - b) tehnički opis terena prikazanog na situacionom planu;
 - c) tehnički opis objekta za koji se traži odobrenje lokacije;
 - d) popis vrsta i količina zapaljivih tečnosti i gasova koji se skladište u objektu za koji se traži lokacija.

Član 63 (Urbanistička saglasnost)

Urbanistička saglasnost za izgradnju objekta za uskladištavanje i trgovinski promet zapaljivih tečnosti i gasova neće se izdati ako se ne pribavi odobrenje za lokaciju iz člana 62 ovog zakona.

Član 64 (Odobrenje za izgradnju objekata)

Odobrenje za izgradnju objekata za uskladištavanje i trgovinski promet zapaljivih tečnosti i gasova izdaje nadležno odjeljenje Vlade Brčko distrikta BiH uz

prethodno pribavljenu saglasnost na investiciono-tehničku dokumentaciju od odjeljenja Vlade Brčko distrikta BiH nadležnog za poslove javne sigurnosti.

Član 65 (Odobrenje za upotrebu objekata)

- (1) Upotrebu objekata za smještaj i trgovinski promet zapaljivih tečnosti i gasova, odobrava organ koji je izdao odobrenje za izgradnju.
- (2) Odobrenje za upotrebu objekta se izdaje nakon izvršenog tehničkog pregleda.
- (3) U odobrenju o predaji na upotrebu objekata iz stava 2 ovog člana određuje se koje vrste zapaljivih tečnosti i gasova i u kojim količinama se mogu smještati u ove objekte.

Član 66 (Postrojenja i uređaji s korištenjem zapaljive tečnosti ili gasa)

- (1) Postrojenja i uređaji s korištenjem zapaljive tečnosti ili gasa mogu se postavljati i koristiti samo ako odgovaraju propisanim tehničkim normativima i standardima.
- (2) Za postavljanje, kao i za upotrebu ovih postrojenja i uređaja, za čije postavljanje nije predviđeno odobrenje za građenje, potrebno je odobrenje odjeljenja Vlade Brčko distrikta BiH nadležnog za poslove javne sigurnosti.
- (3) Uz zahtjev za izdavanje odobrenja za postavljanje postrojenja i uređaja iz stava 1 ovog člana, podnosilac zahtjeva dužan je da priloži dokumentaciju iz stava 3 člana 62 ovog zakona.
- (4) Odobrenje iz stava 2 ovog člana izdaje se uz prethodno pribavljeno mišljenje odjeljenja Vlade Brčko distrikta BiH nadležnog za poslove urbanizma i nakon provođenja upravnog postupka.
- (5) Upravni postupak iz stava 4 ovog člana sastoji se od:
 - a) inspekcijskog pregleda lokacije postrojenja i uređaja iz stava 1 ovog člana i priložene dokumentacije iz stava 3 člana 62 ovog zakona;
 - b) osiguranja dokaza od investitora o pravu svojine, odnosno pravu korištenja građevine, građevinskog objekta ili građevinskog zemljišta radi postavljanja postrojenja i uređaja iz stava 1 ovog člana;
 - c) donošenja rješenja kojim se odobrava lokacija za postavljanje postrojenja i uređaja iz stava 1 ovog člana;
 - d) inspekcijskog pregleda izvedenih radova na postavljanju postrojenja i uređaja iz stava 1 ovog člana, u skladu s projektnom dokumentacijom i tehničkim propisima;
 - e) donošenja rješenja kojim se odobrava korištenje postrojenja i uređaja iz stava 1 ovog člana.

- (6) Postrojenjem i uređajem iz stava 1 ovog člana smatra se ono postrojenje i uređaj za čije postavljanje nije potrebna izgradnja, rekonstrukcija, dogradnja, nadziđivanje građevine, odnosno objekta, kao i izgradnja u svrhu promjene namjene.

Član 67 (Privremene pumpne stanice)

- (1) Privremene pumpne stanice za snabdijevanje dizel-gorivom (D-2) motornih vozila mogu se postaviti i koristiti samo ako odgovaraju tehničkim normativima i standardima.
- (2) Privremena pumpna stanica se može postaviti samo na radilištima i kod zemljoradničkih zadruga.
- (3) Za postavljanje kao i za upotrebu stanica iz stava 1 ovog člana potrebno je odobrenje odjeljenja Vlade Brčko distrikta BiH nadležnog za poslove javne sigurnosti.
- (4) Uz zahtjev za izdavanje odobrenja za postavljanje privremenih pumpnih stanica iz stava 1 ovog člana podnosilac zahtjeva dužan je da priloži dokumentaciju iz stava 3 člana 62 ovog zakona.
- (5) Lokacija za privremenu pumpnu stanicu izdaje se s rokom od dvije godine i na zahtjev korisnika može se produžiti za jednu godinu.
- (6) Privremena pumpna stanica se sastoji od jednog nadzemnog čeličnog rezervoara koji na sebi ima uređaje za točenje i mjerenje goriva i oni su sastavni dijelovi rezervoara.
- (7) U rezervoaru se može skladištiti samo dizel-gorivo (D-2) u količini do 30.000 litara.
- (8) Najmanja udaljenost nadzemnog čeličnog rezervoara od drugih objekata je deset metara, a zemljište oko rezervoara je bez rastinja i lahko zapaljivog materijala.

Član 68 (Uslovi koje moraju ispunjavati objekti u kojima se proizvode i upotrebljavaju zapaljive tečnosti i gasovi)

- (1) Objekti u kojima se proizvode i upotrebljavaju u tehnološkom procesu zapaljive tečnosti i gasovi, kao i objekti u kojima se drže zapaljive tečnosti i gasovi, snabdjeveni su uređajima i aparatima za gašenje požara i imaju gromobransku instalaciju i instalaciju i uređaje za eliminaciju statičkog elektriciteta.
- (2) Uređaji, aparati i instalacije iz stava 1 ovog člana moraju biti u ispravnom stanju i oni se redovno ispituju prema tehničkim propisima i uputstvu proizvođača, o čemu se vodi evidencija.

Odjeljak C. Mjere zaštite objekata

Član 69 (Mjere fizičke zaštite)

- (1) Objekti u kojima se proizvode zapaljive tečnosti i gasovi, kao i magacini i skladišta u kojima se čuvaju zapaljive tečnosti u količini većoj od 5.000 kubnih metara ili gasovi u količini većoj od 1.000 kubnih metara, su osigurani fizičkom zaštitom i odgovarajućim zaštitnim pojasom.
- (2) Gradonačelnik Brčko distrikta BiH može odrediti da pojedini magacini i skladišta u kojima se čuvaju i manje količine zapaljivih tečnosti i gasova od propisanih u stavu 1 ovog člana, kao i pojedine stanice za snabdijevanje gorivom vozila na motorni pogon, budu osigurani fizičkom zaštitom, odnosno da se na drugi način osigura fizička zaštita ovih objekata potrebna za njihovu sigurnost.

Član 70 (Ostale mjere zaštite)

- (1) U magacinima, skladištima i rezervoarima ne smije se držati količina zapaljivih tečnosti i gasova veća od određenog kapaciteta odnosnog objekta.
- (2) U objektima u kojima se uskladištavaju ili drže zapaljive tečnosti i gasovi, kao i u njihovoj blizini, odnosno u zoni opasnosti, zabranjeno je proizvoditi ili unositi otvoreni plamen, žar ili užarene predmete, pušiti, kao i raditi alatom koji varniči.
- (3) Zona opasnosti, u smislu odredbe stava 2 ovog člana, je prostor u kome postoji mogućnost stvaranja smjese para zapaljive tečnosti ili smjese zapaljivih gasova sa zrakom koja se može zapaliti.
- (4) Zona opasnosti osigurava se od pristupa vozila koja pri radu pogonskog uređaja mogu izbacivati iskre.
- (5) Preduzeća, druga pravna lica i preduzetnici dužni su da na svojim objektima na vidnom mjestu istaknu natpise ili oznake kojima se upozorava na zabranu iz stava 4 ovog člana.

DIO TREĆI

GLAVA I. OVLAŠTENJE I SADRŽAJ NADZORA

Član 71 (Ovlaštenje za vršenje nadzora)

- (1) Nadzor nad provođenjem zaštitnih i drugih mjera sigurnosti propisanih ovim zakonom u vezi s prometom eksplozivnih materija vrši Policija, a u vezi s prometom zapaljivih tečnosti i gasova vrši odjeljenje Vlade Brčko distrikta BiH nadležno za poslove javne sigurnosti.

- (2) U vršenju inspekcijskih poslova, u smislu člana 70 ovog zakona, ovlaštena lica organa iz člana 70 ovog zakona, imaju pravo da u preduzećima, drugim pravnim licima i kod preduzetnika ili pojedinaca, u skladu sa zakonom, pregledaju sve prostorije, radilišta i uređaje, da u vezi s tim prikupljaju obavještenja i preduzimaju druge radnje potrebne za utvrđivanje primjene propisanih sigurnosnih mjera i tehničkih normativa.

Član 72 **(Sadržaj inspekcijskog nadzora)**

- (1) Radi sprečavanja izbijanja i širenja požara, odnosno nastanka eksplozije, ovlaštena lica organa iz člana 71 ovog zakona mogu:
- a) narediti da se utvrđene nepravilnosti otklone i odrediti rok za njihovo otklanjanje;
 - b) zabraniti preduzeću, drugom pravnom licu, preduzetniku ili pojedincu da se bave prometom ili da upotrebljavaju zapaljive tečnosti i gasove, ako nisu osigurani uslovi propisani zakonom ili propisom o tehničkim normativima;
 - c) zabraniti upotrebu magacina i drugih objekata za smještaj ili držanje eksplozivnih materija, zapaljivih tečnosti i gasova, kao i naftovoda i gasovoda, ako nisu ispunjeni za to propisani uslovi ili ako su prestali razlozi zbog kojih je taj objekat izgrađen;
 - d) zabraniti daljnje rukovanje eksplozivnim materijama, zapaljivim tečnostima i gasovima, licima koja nisu stručno osposobljena za rukovanje tim materijama;
 - e) obustaviti izgradnju i rekonstrukciju naftovoda ili gasovoda, magacina ili drugih objekata za smještaj eksplozivnih materija, zapaljivih tečnosti i gasova, za čiju lokaciju, izgradnju ili rekonstrukciju ne postoji saglasnost, odnosno odobrenje nadležnog organa Brčko distrikta BiH, dok se ne pribavi saglasnost, odnosno odobrenje;
 - f) zabraniti utovar i istovar eksplozivnih materija i zapaljivih tečnosti i gasova na posebnom mjestu koje su odredila odgovarajuća preduzeća na željezničkim stanicama ili pristaništima, ako to mjesto nije odvojeno ili dovoljno udaljeno od ostalog prometa i objekata ili ako nisu preduzete druge propisane ili naložene sigurnosne mjere;
 - g) zabraniti korištenje prostorija i uređaja iz stava 1 člana 66 ovog zakona, korištenje privremenih pumpnih stanica iz stava 1 člana 67 ovog zakona i narediti demontiranje sudova sa zapaljivom tečnošću ili gasom;
 - h) zabraniti promet eksplozivnih materija i zapaljivih tečnosti i gasova čiji sudovi i druga ambalaža, pakovanje i oznake nisu u skladu s odredbama člana 6 ovog zakona, dok se utvrđeni nedostaci ne otklone;
 - i) privremeno oduzeti eksplozivne materije pojedincu koji te materije drži ili upotrebljava protivno odredbama ovog zakona;

- j) narediti preduzimanje i drugih propisanih mjera u vezi s prometom, rukovanjem i čuvanjem eksplozivnih materija, odnosno proizvodnjom i prometom zapaljivih tečnosti i gasova.
- (2) Zabrane iz stava 1 tački b, c, d, e, f, g i h ovog člana izriču se za vrijeme dok se utvrđeni nedostaci ne otklone.
- (3) U rješenjima kojima se određuje preduzimanje mjera iz stava 1 ovog člana, može se odrediti da žalba ne odlaže izvršenje rješenja.

GLAVA II. KAZNE NE ODREDBE

Član 73

- (1) Novčanom kaznom od 500 do 5.000 KM kaznit će se za prekršaj preduzeće ili drugo pravno lice:
- a) ako eksplozivnu materiju stavi u promet prije dobijanja odobrenja za njeno stavljanje u promet (stav 1 člana 15 ovog zakona);
 - b) ako pozajmi eksplozivnu materiju preduzeću koje nema odobrenje za nabavku te materije ili je pozajmi u količini većoj od količine navedene u odobrenju za nabavku eksplozivnih materija (stav 1 člana 24 ovog zakona);
 - c) ako se bavi trgovinskim prometom eksplozivnih materija bez odobrenja Policije (stav 1 člana 26 ovog zakona);
 - d) ako magacin za smještaj eksplozivnih materija ne održava u skladu s propisanim tehničkim normativima (stav 1 člana 48 ovog zakona);
 - e) ako u magacinu za smještaj eksplozivnih materija drži eksplozivne materije protivno stavu 2 člana 48 ovog zakona;
 - f) ako postrojenja ili uređaje iz stava 2 člana 66 upotrijebi bez odobrenja nadležnog organa;
 - g) ako privremene pumpne stanice iz stava 3 člana 67 ovog zakona upotrijebi bez odobrenja nadležnog organa;
 - h) ako nastavi da se bavi prometom ili da upotrebljava zapaljive tečnosti i gasove i pored zabrane (stav 1 tačka b člana 72 ovog zakona);
 - i) ako upotrebljava magacin ili drugi objekat za smještaj ili držanje eksplozivnih materija ili zapaljivih tečnosti i gasova, odnosno koristi naftovod ili gasovod i pored zabrane (stav 1 tačka c člana 72 ovog zakona).
- (2) Za prekršaj iz stava 1 ovog člana kaznit će se novčanom kaznom od 50 do 1.000 KM i odgovorno lice u preduzeću ili drugom pravnom licu.

- (3) Za prekršaj iz stava 1 tački a, b, c, d i i ovog člana pravnom licu se može izreći zaštitna mjera zabrane proizvodnje i trgovinskog prometa eksplozivnim materijama u vremenu do tri godine od dana pravosnažnosti rješenja.

Član 74

- (1) Novčanom kaznom od 500 do 3.000 KM kaznit će se za prekršaj preduzeće ili drugo pravno lice:
- a) ako drži eksplozivne materije i zapaljive tečnosti i gasove u sudovima ili drugoj ambalaži iz koje pri rukovanju i uskladištenju može doći do rasipanja ili dodira tih materija s podom skladišta ili druge prostorije u kojoj su te materije smještene (stav 2 člana 6 ovog zakona);
 - b) ako povjeri rukovanje eksplozivnim materijama, zapaljivim tečnostima i gasovima u prometu maloljetnom licu ili licu koje nije stručno osposobljeno za rukovanje tim materijama (stav 1 člana 7 ovog zakona);
 - c) ako ne organizuje ili trajno ne kontroliše provođenje propisanih mjera i uslova (stav 1 člana 9 ovog zakona);
 - d) ako svojim aktom ne utvrdi sigurnosne mjere (stav 2 člana 9 ovog zakona);
 - e) ako pakovanja eksplozivnih materija ili obilježavanje pakovanja ne vrši na propisan način ili ako uz svako pakovanje ne priloži propisano uputstvo (član 14 ovog zakona);
 - f) ako nabavi ili drži eksplozivne materije za koje nema odobrenje za nabavku (stav 1 člana 19 ovog zakona);
 - g) ako upotrijebi eksplozivnu materiju protivno rješenju kojim je nabavka odobrena ili ako ne preduzme sigurnosne mjere naložene rješenjem (stavovi 2 i 3 člana 22 ovog zakona);
 - h) ako u roku od osam dana od dana pozajmljivanja ne obavijesti stanicu koja je izdala odobrenje za nabavku eksplozivne materije o vrsti i količini pozajmljene eksplozivne materije (stav 2 člana 24 ovog zakona);
 - i) ako stavi u promet eksplozivnu materiju za koju nije pribavio od proizvođača stručno mišljenje o njenim osobinama ili ako uz stručno mišljenje ne priloži uputstvo o načinu upotrebe eksplozivne materije i uputstvo o načinu njenog korištenja (član 27 ovog zakona);
 - j) ako na oba primjerka rješenja ne naznači datum izdavanja eksplozivnih materija i propisane oznake pakovanja (stav 4 člana 28 ovog zakona);
 - k) ako ne vodi propisane evidencije o nabavci i prodaji eksplozivnih materija ili ih ne vodi uredno (član 29 ovog zakona);

- l) ako u prodavnici ili priručnom skladištu smjesti eksplozivne materije koje se ne mogu držati u tim objektima ili ih drži u količini većoj od 20 kg (član 30 ovog zakona);
- m) ako se u prodavnici van radnog vremena eksplozivne materije ne čuvaju u metalnoj kasi ili ako se te materije ne smještaju ili ne čuvaju na propisani način (član 31);
- n) ako prevozi eksplozivnu materiju bez odobrenja (stav 1 člana 32 ovog zakona);
- o) ako ne preduzme posebne mjere sigurnosti pri prijevozu određene eksplozivne materije koje je propisao nadležni organ (stav 2 člana 33 ovog zakona);
- p) ako eksplozivne materije preda ili primi na prijevoz kao prtljag (stav 2 člana 35 ovog zakona);
- q) ako ne postupi po odredbama iz člana 36 ovog zakona;
- r) ako upotrebljava eksplozivne materije iako nije registrovano za obavljanje djelatnosti koja zahtijeva upotrebu eksplozivnih materija ili ako poslove neposredne upotrebe eksplozivnih materija u redovnoj djelatnosti ili građevinarstvu povjeri licu koje za to ne ispunjava uslove (stavovi 1 i 2 člana 37 ovog zakona);
- s) ako ne postupi po odredbama člana 38 ovog zakona;
- t) ako ne vrati neupotrijebljenu eksplozivnu materiju i neupotrijebljenu ambalažu u kojoj je bila upakovana eksplozivna materija preduzeću, drugom pravnom licu ili preduzetniku od kojih ih je nabavilo ili ih ne uništi u skladu s uputstvom proizvođača i na način kojim se ne ugrožava život, zdravlje i sigurnost ljudi, materijalnih dobara i čovjekova sredina, ili ako ne obavijesti Policiju o mjestu, vremenu i načinu uništenja neupotrijebljene eksplozivne materije i neupotrijebljene ambalaže najkasnije dva dana od dana određenog za uništenje te materije (član 39 ovog zakona);
- u) ako Policiji u propisanom roku ne prijavi eksplozivne materije koje drži, a dužan je da to učini ili ako upotrijebi eksplozivne materije protivno zabrani Policije (član 40 ovog zakona);
- v) ako ne vodi evidenciju propisanu u članu 41 ovog zakona ili ako tu evidenciju ne vodi uredno;
- w) ako ispaljivanje protivgradnih raketa vrši protivno odredbama člana 42 ovog zakona;
- x) ako ne pribavi odobrenje za priređivanje vatrometa (stav 1 člana 43 ovog zakona);

- y) ako prodaje pirotehnička sredstva za zabavu klase II suprotno odredbama stava 2 člana 44 ovog zakona;
- z) ako na svakom pojedinačnom pakovanju pirotehničkih sredstava za zabavu proizvođač, odnosno uvoznik ne postavi natpis na jeziku jednog od konstitutivnih naroda u Bosni i Hercegovini s nazivom proizvoda i proizvođača, klase, upozorenjem i uputstvom za upotrebu (stav 4 član 44 ovog zakona);
- aa) ako u izlozima drži pirotehnička sredstva za zabavu (stav 1 člana 45 ovog zakona);
- bb) ako vrši maloprodaju pirotehničkih sredstava za zabavu klase II izvan perioda određenog aktom Policije iz stava 3 člana 45 ovog zakona;
- cc) ako ne vodi propisane evidencije o prometu pirotehničkih sredstava za zabavu ili ih ne vodi uredno (član 46 ovog zakona);
- dd) ako držanje eksplozivnih materija nije u skladu s rješenjem kojim je odobrena upotreba magacina (stav 2 člana 48 ovog zakona);
- ee) ako magacine u kojima su smještene eksplozivne materije ne osigura u skladu s članom 49 ovog zakona;
- ff) ako drži eksplozivne materije protivno odredbama člana 50 ovog zakona;
- gg) ako u kontejneru ili privremenom skladištu drži veću količinu eksplozivnih materija od dozvoljene (stav 1 člana 54 ovog zakona);
- hh) ako privremeno skladište postavi na mjesto za koje nije izdala odobrenje Policija ili ako to skladište koristi za držanje eksplozivnih materija poslije isteka određenog roka (stavovi 2 i 5 člana 54 ovog zakona);
- ii) ako ne održava privremeno skladište, uređaje i instalacije u njemu, kao i zaštitnu zonu prema propisanim tehničkim normativima ili ako ne organizuje fizičku zaštitu tog objekta (član 55 ovog zakona);
- jj) ako zapaljive tečnosti i gasove drži u posudama ili objektu koji ne odgovaraju tehničkim normativima i standardima (član 58 ovog zakona);
- kk) ako vrši promet zapaljivih tečnosti i gasova protivno odredbama člana 60 ovog zakona;
- ll) ako proizvodi, prerađuje i uskladištava zapaljive tečnosti i gasove izvan za to određenih i propisno izgrađenih objekata (član 61 ovog zakona);
- mm) ako u privremenim pumpnim stanicama drži dizel-gorivo (D-2) u količini većoj od propisane (stav 7 člana 67 ovog zakona);
- nn) ako objekte u kojima se proizvode zapaljive tečnosti i gasovi i objekte u kojima se drže zapaljive tečnosti i gasovi ne snabdije uređajima i aparatima

za gašenje požara, gromobranskom instalacijom i uređajima za eliminaciju statičkog elektriciteta, ili ako te objekte, uređaje i instalacije ne održava u ispravnom stanju (član 68 ovog zakona);

- oo) ako objekte iz člana 69 ovog zakona ne osigura fizičkom zaštitom ili odgovarajućim zaštitnim pojasom;
 - pp) ako u magacinu, odnosno skladištu ili rezervoaru drži zapaljive tečnosti i gasove u količini većoj od dozvoljene (stav 1 člana 70 ovog zakona);
 - qq) ako ne preduzme propisane mjere osiguranja ili ne istakne natpise ili oznake (stavovi 2, 4 i 5 člana 70);
 - rr) ako sprečava ili ometa inspektora ili ovlaštena lica u vršenju nadzora ili odbije da mu da potrebna obavještenja i podatke (stav 2 člana 71 ovog zakona);
 - ss) ako utovara ili istovara eksplozivne materije, odnosno zapaljive tečnosti i gasove i pored zabrane (tačka f stava 1 člana 72) ovog zakona;
 - tt) ako postrojenja i uređaje iz stava 1 člana 66 ovog zakona upotrebljava bez odobrenja ili ako ih upotrebljava i pored zabrane iz stava 1 tačke g člana 72 ovog zakona.
- (2) Za prekršaj iz stava 1 ovog člana kaznit će se novčanom kaznom od 50 do 500 KM i preduzetnik i odgovorno lice u preduzeću ili drugom pravnom licu.

Član 75

Novčanom kaznom u iznosu od 100 do 1.500 KM kaznit će se preduzetnik za prekršaj iz stava 1 člana 74 izuzev prekršaja iz člana 74 stava 1 tačke oo ovog zakona.

Član 76

- (1) Novčanom kaznom u iznosu od 100 do 1.500 KM kaznit će se za prekršaj pojedinac:
- a) ako eksplozivne materije na bilo koji način stavlja u promet (stav 2 člana 12 ovog zakona);
 - b) ako posjeduje eksplozivne materije za koje nema odobrenje za nabavku (stav 1 člana 19 ovog zakona);
 - c) ako eksplozivne materije upotrijebi u svrhu koja nije određena rješenjem kojim mu je odobrena nabavka eksplozivnih materija ili ako ne preduzme naložene sigurnosne mjere (stavovi 2, 3 i 4 člana 22 ovog zakona);
 - d) ako po završenim radovima, preostalu količinu eksplozivne materije ne vrati preduzeću, drugom pravnom licu ili preduzetniku od kojeg je nabavio ili je

- stručno lice ne uništi ili ako o tome ne obavijesti Policiju (stav 4 člana 23 ovog zakona);
- e) ako nabavljene eksplozivne materije ne čuva brižljivo ili se kod njihove upotrebe, čuvanja i smještaja ne pridržava uputa proizvođača (član 36 ovog zakona);
 - f) ako ne postupi po odredbama člana 38 ovog zakona;
 - g) ako dopremljene eksplozivne materije u propisanom roku ne prijavi Policiji ili ako te materije upotrijebi protivno zabrani (član 40 ovog zakona);
 - h) ako pirotehnička sredstva za zabavu klase II upotrebljava suprotno odredbama stava 2 člana 45 ovog zakona;
 - i) ako pirotehnička sredstva za zabavu klase II upotrebljava izvan perioda određenog aktom Policije iz stava 3 člana 45 ovog zakona;
 - j) ako ključeve od prostorija u kojima su smještene eksplozivne materije povjeri licu koje se ne stara o smještaju i izdavanju tih materija (stav 2 člana 49 ovog zakona);
 - k) ako se bavi trgovinskim prometom zapaljivih tečnosti i gasova suprotno odredbama člana 60 ovog zakona;
 - l) ako postrojenja ili uređaje iz stava 1 člana 66 ovog zakona upotrebljava bez odobrenja ili ako ih upotrebljava i pored zabrane po odredbi stava 1 tačke g člana 72 ovog zakona.
- (2) Ako maloljetnik učini radnju koja je ovim zakonom utvrđena kao prekršaj, kaznit će se roditelj, usvojitelj, odnosno staratelj maloljetnika novčanom kaznom propisanom za učinjeni prekršaj ako je taj prekršaj učinjen kao posljedica propusta dužnog staranja o maloljetniku.

GLAVA III. OVLAŠTENJE ZA DONOŠENJE PROPISA

Član 77 (Ovlaštenja Vlade)

Vlada Brčko distrikta BiH, na prijedlog šefa Policije i šefa Odjeljenja za javnu sigurnost, donosi bliže propise:

- a) o stručnoj spremi i načinu provjere stručnog znanja lica koja mogu rukovati eksplozivnim materijama i zapaljivim tečnostima i gasovima u vršenju poslova čuvanja, utovara, istovara, uskladištenja i trgovinskog prometa o ovim materijama kao i o troškovima provjere znanja;
- b) o mjerama zaštite i odgovarajućim tehničkim normativima magacina za smještaj eksplozivnih materija;

- c) i druge propise potrebne za provođenje ovog zakona.

Član 78
(Ovlaštenja šefa Policije)

Ovlašćuje se šef Policije Brčko distrikta BiH da donese bliže propise o:

- a) uslovima koje moraju ispunjavati prodavnice eksplozivnih materija na malo, kontejneri i druga priručna skladišta za držanje eksplozivnih materija, kao i uslovima i načinu njihovog korištenja;
- b) obrascima i načinu vođenja evidencija koje su dužna voditi Policija, preduzeća, druga pravna lica i samostalni privrednici po odredbama članova 25, 29, 41 i 46 ovog zakona.

Član 79
(Rok za donošenje propisa)

Rok za donošenje propisa iz člana 78 ovog zakona je šest mjeseci od dana stupanja na snagu ovog zakona.

DIO ČETVRTI

GLAVA I. PRIJELAZNE ODREDBE

Član 80
(Usklađivanje poslovanja)

- (1) Preduzeća, druga pravna lica i preduzetnici koji na dan stupanja na snagu ovog zakona obavljaju poslove prometa eksplozivnih materija predviđene ovim zakonom dužna su u roku od šest mjeseci od dana stupanja na snagu ovog zakona uskladiti svoje poslovanje s ovim zakonom.
- (2) Preduzeća, druga pravna lica i preduzetnici iz stava 1 ovog člana koja ne usklade svoje poslovanje s odredbama ovog zakona u zakonskom roku, prestaju s radom, o čemu Policija donosi rješenje.

Član 81
(Žalba na rješenje)

- (1) Protiv rješenja iz stava 2 člana 80 može se u roku od 15 (petnaest) dana od dana prijema rješenja izjaviti žalba Apelacionoj komisiji Brčko distrikta BiH.
- (2) Žalba ne odlaže izvršenje rješenja.
- (3) Konačno rješenje iz stava 2 člana 80 dostavlja se Osnovnom sudu Brčko distrikta BiH radi brisanja iz sudskog registra.

GLAVA II. ZAVRŠNE ODREDBE

Član 81 (Stavljanje van snage propisa)

Danom stupanja na snagu ovog zakona prestaje da se primjenjuje Zakon o prometu eksplozivnih materija i zapaljivih tečnosti i gasova («Službeni glasnik Republike Srpske», broj 16/96) preuzet kao zakon Brčko distrikta BiH, Nalogom supervizora za Brčko distrikt od 4. 8. 2006. godine.

Član 82 (Stupanje na snagu)

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Broj: 0-02-022-76/07
Brčko, 26. juna 2007. godine

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić, s.r.